

GREGORIUS EPISCOPUS SERVUS SERVORUM DEI

AD PERPETUAM REI MEMORIAM

Exordium. – Formula vivendi.

Illius, qui pro gregis Dominici salute in ara Crucis immolari non abnuit, vices quamvis immeriti gerentes in terris curis urgemur assiduis, et continua meditatione pulsamur circa ea, quae pro pauperum Christi infirmorum necessitatibus nedum corporalibus, sed etiam spiritualibus adiuvandis in hac Urbe nostra pie instituta sunt, omni studio intendere, et quae propterea provide facta fuisse dicuntur ut firma perpetuo, et illibata persistent Apostolico munimine roboramus, et ut ad praemissa peragenda Christifideles libentius concurrant, Fideles ipsos spiritualibus muneribus prosequimur, ut exinde reddantur divinae gratiae aptiores, ac caritatis, et misericordiae fervor in dies amplius augeatur in eis, aliaque desuper concedimus prout conspicimus in Domino salubriter expedire.

Cum itaque dudum fel. rec. Sixtus Papa V Praedecessor noster certis causis adductis ex certa sua scientia Congregationem sub vocabulo, seu nomine Ministrantium Infirmis in Urbe tunc constitutam per suas in forma Brevis desuper confectas litteras perpetuo approbaverit, et confirmaverit prout in ipsis litteris plenius continetur: et sicut accepimus dilecti filii Camillus de Lellis, modernus ipsius Congregationis Praefectus, et alii eius Socii cupientes in caritatis vinculo persistere, et maiori cum animi quiete Deo servire, et ad perficiendam, et conservandam eorum Congregationis in Christo unionem quamdam vivendi formulam, iuxta ea, quae ad propositum sibi finem conducere usu didicerunt, ediderint; factumque sit ut eorundem Camilli, et Sociorum vitae Institutum sub dicta formula comprehensum Fidelibus gratum, et acceptum, ac ad proximi subventionem adeo utile, et necessarium existat ut ipsa Congregatio numero sociorum admodum creverit, et quamplures Christifideles summo desiderio, et affectu in dictam Congregationem recipi, et admitti plurimum exoptent. Formulae autem praedictae tenor sequitur, qui talis est.

1. Finis generalis et specialis Congregationis. Obligatio Constitutionum.

Quisquis decreverit se huic caritatis muneri in perpetuum addicere, statuat, se mundo, rebusque omnibus saeculi esse mortuum, et Christo soli vivere, seque nobis aggreget ut admissa peccata expiet sub iugo suavissimo perpetuae Paupertatis, Castitatis, et Obedientiae, et sub perenni Ministerio aegrotantium, quos etiam pestis incesserit, non solum in Nosocomiis, sed etiam in carcerum Valetudinariis, ubi aegroti magna tam corporalium, quam spiritualium rerum angustia premuntur: ac de his universis (Deo adiuvante) praecepta dabuntur in Constitutionibus suo tempore edendis, quibus sub ullius peccati poena obstringi non intendimus, iis tamen exceptis, ad quae observanda votorum vinculis obligamur.

2. Paupertas Mendicantium.

Paupertatem nostram ita interpretamur, ut Religiosorum sit paupertas Mendicantium eorum, qui nec singuli, nec universi fructus ullos, ac redditus capiant; quae vero necessaria erunt, ea ex humili exercitio ostiatim emendicandi, vel ex eleemosynis Fidelium nobis sponte oblatis comparabimus: nemo per se, et arbitrato suo quaeritabit, sed ii soli, quibus ob communem usum ab obedientia id oneris imponetur.

3. Gubernium Congregationis.

Totius Congregationis Superior Praefectus Generalis appellabitur, cuius officium perpetuum erit quoad vivet; Socios autem habebit quatuor, qui Consultores dicentur. Creabuntur autem hi cum Congregatio maiorem numerum erit nacta idoneorum hominum; iique pariter officium perpetuum gerent dum Generalis Praefectus erit superstes. Votum eorum, aequae ac Praefecti decisivum erit, praeterquam quod Praefectus duplex habebit, singuli illi simplex. Nihil eorum, de quibus secundum Constitutiones factas, aut faciendas cum Consultoribus discernendum est, statuetur nisi de illorum consilio, et sententia; maior vero pars sententiarum vincet. Ne autem ex sententiarum aequalitate res in dubium veniat, ad id Vir gravis de Congregatione deputetur, qui voto suo (prout necessitas postulaverit) alterius, quam meliorem censuerit, partis numerum augeat. Praefectus una cum Sociis potestatem haebit tum interpretandi, et ea explicandi, de quibus super Instituto nostro (quod hic summatim comprehenditur) dubitatio fuerit orta, tum Constitutionum ad optimam Congregationis disciplinam faciendarum. Constitutiones autem experiendo

primum, atque utendo expendentur, deinde a Capitulo, sive Congregatione generali, prout expedire videbitur, admittentur. Praefectus Generalis, ac Socii Praefectos aliorum locorum, ubi Congregatio sedem habeat, et Provinciales, et Visitatores, quos oportuerit, eligent. Electio vero Generalis Praefecti, et Consultorum posthac in Congregatione generali facienda est. In praesens quidem Generalis creabitur suffragiis maioris eorum partis, qui nunc Crucem gerunt, ac iuxta formam statuendam. Idem statim ac denunciatus Generalis fuerit quatuor Votorum professione, Obedientiae scilicet, Paupertatis, Castitatis, et quod praecipuum huius Instituti scopum continet, perennis (ut dictum est) Ministerh aegrotantium solemniter se obstringet, tuncque apud ipsum aut eum, cui is hoc negotii dederit, eodem modo profitebuntur omnes qui specimen sui dederint, et idonei, ac digni iudicati fuerint.

4. Ministerium infirmorum in nosocomiis. Quaenam ibi sint evitanda.

Volumus autem nostros in Nosocomiis, cum Superiorum suorum iussu (consentientibus eorundem Nosocomiorum Praefectis) mittentur, ita operam navare ut nulla publica officia, magistratusve, aut reddituum administrationem in iis suscipiant; verum omnes curam aegrotorum tum corporis, tum animae gerant, et aliquot ex ipsis nocturnas excubias, diurnasque ibi ducant, atque aegrotis agonizantibus donec ex hac vita migrent nusquam desint. Quod si nobis, ut caeteris pauperibus, Nosocomiorum Patroni, aut Administratores aliquid eleemosinae sive quolidianae, sive mensurae, sive annuae, sive in plures annos largiri voluerint, Congregatio nostra ius nullum habeat id exigendi; sed quae dabuntur liberaliter, cum gratiarum actione accipiet. Nos enim curae aegrotorum incumbimus nulla mercede, vel spe temporali adducti, sed ex Instituti nostri obligatione. Itaque ab aegrotis hospitalium - nulla munera, nihil pecuniae, nullam omnino rem Nostrae capiant, ac ne per submissas quidem personas. Legata ab iis, qui in Nosocomiis defuncti fuerint, in rem nostram relicta, non admittantur. Qui in hospitalibus sunt Nosocomiorum Officiales, et famuli in Congregationem nostram non recipiantur sine assensu eorum, qui illis locis praefecti sunt.

5. Ministerium infirmorum in domibus privatis.

Experiendo didicimus plurimis, maximisque difficultatibus, et incommodis animae praesertim eos confictari, qui extra Nosocomia, et Carceres in aliis locis aegrotant, ac potissimum tenues, et plebeios homines, externosque, qui conducto

degunt. Quare volumus (adiuvante Domino nostro Iesu Christo) a Nostris eos invisi, et iis, quoad fieri poterit, adhiberi consolationem, exhortationem, et alia huiusmodi iuxta Constitutiones edendas: priusquam vero illi sensuum usum amittant, adducantur pro cuiusque conditione, et natura ad protestationes secundum formam Ecclesiae sanctae faciendas; cumque ingravescet morbus, diu noctuque apud eos excubent Nostri, animamque commendent, ac salutaribus monitis opitulentur, magnumque ponatur in eo studium ut hortationibus piis informantur, ne tentationibus succumbant, et in illo formidoloso vitae exitu confortentur, tum ut bene, ac diligenter commendentur animae. Caveant autem maxime ne quisquam eorum, qui ad visendos per eiusmodi loca aegrotos, et ad caritatem iis praestandam, opemque offerendam mittentur, ob labores suos ullum munus, aut rem, pecuniamve accipiant, nec ullam, vel exiguam stipem, atque eleemosinam; sed omnia ad solam Domini Dei gloriam, animarumque salutem fiant, atque administrentur. Quinimo ut nostrarum utilitatum ratio omnis praetermittatur, nec quisquam proprio emolumento studeat, neququam Nostri aegrotis auctores sint, neque consilium dent, aut hortentur ut aliquid erogent eleemosynae, aut testamentum faciant, aut legata relinquunt in rem, atque utilitatem nostram.

6. Officium divinum.

Propter multas Instituti nostri. occupationes qui sacris ordinibus initiati erunt, divinum Officium quotidie recitabunt, non in choro, sed privatim, ac singillatim; caeteri tertiam Beatissimae Virginis Rosarii partem, vel eius officium parvum.

7. Processiones. Religiosi sub speciali cura Sanctae Sedis.

Processiones etiam solemnissimas, caeterasque solemnitates (quibus pie alii religiosi Ordines intersunt) ipsi non obibunt ut liberius magisque assidue aegrotis operam navent: quo in ministerio perseverare cupimus immediate subditi curae, animadversioni, speciali protectioni, ac defensioni SSmi D. N. Papae, sanctaeque Sedis Apostolicae.

8. Exercitia pietatis et mortificationis.

Ut autem spiritum Nostri recreent, ac pascant, possintque tantam divinae gratiae ubertatem adipisci, ut munera, et officia sua cum caritate exequantur, exercebunt se in oratione mentali, et vocali, tum in examine conscientiae, seque

saepissime munient Sacramento confessionis, et Communicatione Corporis Christi, nonnullis item abstinentiis, quae omnia Constitutionibus particulatim exponentur.

9. Novitiatus.

Ac quoniam Nostris, ut alterius saluti consulant, cum proximis assidue conversandum est, volumus Novitios secundum formam edendarum Constitutionum iam admissos praeter accuratam examinationem per hiennium ante prohari quam ad Professionem admittantur, qui a Praefectis iuxta modum in eisdem Constitutionibus statuendum idonei existimati fuerint, exacto biennio, profitebuntur.

10. Vestis Religiosorum.

Vestis erit pauperum, atque honestorum Sacerdotum nigri coloris; pallio autem, ac tunicae dumtaxat eorum, qui Professionem fecerint, assuetur ad dexteram Crux oblonga ad palmi mensuram, ex panno castanei coloris, qui vulgo Tane dicitur.

11. Numerus laicorum. Sacris ordinibus destinandi.

Nostri Instituti ratio postulat ut longe maior esse debeat Laicorum, quam Sacerdotum numerus. Idcirco statuimus eos tantum esse sacris Ordinibus destinandos, quos Praefectus Generalis, atque una Consultores, vel de eorum licentia alii Superiores non aptos modo ad ipsos sacros Ordines, sed etiam ad Ministerium nostrum ex Constitutionum praescripto congruentes, ac necessarios iudicarint.

12. Studium litterarum.

Idemque servandum decernimus erga Clericos, qui ad studium admittentur: ii vero in eo se ex ipsarum Constitutionum regulis exercebunt, ut ita litteris vacent, ne mortificationis et aegrotorum iuvandorum (prout Praefectis visum fuerit) studia omittantur.

13. Loca recreationis et convalescentiae. Habitatio novitiorum.

Propterea quod haec exercitia cum disciplina spirituali coniuncta aerummas, et incommoda afferunt; quodque gravia sunt nobis, ac tetra loca frequentanda, experti sumus eorum tuendae valetudinis causa, qui his officiis in Domino functi fuerint, aliquot loco opus esse ubi puro, libero, ac salubri aere gravis odor, et putor conceptus expurgetur, Nostrique e multis laboribus, ac vigiliis respirent; quem etiam locum destinari cupimus Nostris ex invaletudine se reficientibus quo citius afflictae vires recuperentur. Quare eiusmodi locum habere Congregatio poterit, idque fore interpretamur salva, et integra, cui dediti sumus, paupertate; eius autem loci qualitas Constitutionibus definietur. Quibus praeterea in Urbibus, et Oppidis Congregatio Novitios educabit, possit habitationem habere separatam a Professorum Domo.

14. Plenissima approbatio pontificia huius formulae vivendi.

Cum autem, sicut accepimus, in praemissis nihil quod pium non sit, aut salutare reperiatur, Nos, ut Camillus et Socii praefati in eorum pio vivendi proposito eo promptiores reddantur, quo se maiori Sedis Apostolicae gratia, et favore complecti animadverterint, et praemissa dictae Sedis patrocinio communiri, et corroborari viderint, providere volentes, ac Camillum, et Socios praedictos a quibusvis excommunicationis, suspensionis, et interdicti, aliisque Ecclesiasticis sententiis, censuris, et poenis a iure, vel ab homine quavis occasione, vel causa latis, si quibus quomodolibet innodati existunt ad effectum praesentium dumtaxat consequendum harum serie absolventes, et absolutos fore censentes; nec non dictarum litterarum datam, ac praemissorum omnium, et singulorum veriores etiam totos tenores, ac occasiones, et causas, ac circumstantias etiam hic de necessitate exprimendas praesentibus pro plene, et sufficienter expressis, et insertis habentes; Motu proprio non ad dictorum Camilli, et Sociorum praefatorum, aut aliorum pro eis Nobis desuper oblatae petitionis instantiam, sed ex certa scientia nostra, et de Apostolicae potestatis plenitudine praemissa omnia, et singula tanquam ad spiritualem profectum animarum pertinentia, et opportuna Apostolica auctoritate tenore praesentium perpetuo approbamus, et confirmamus, ac illis perpetuae, et inviolabilis firmitatis robur, et patrocinium adiicimus, et apponimus; omnesque et singulos tam iuris, quam facti, ac quarumcumque solemnitatum etiam substantialium hic forsitan de necessitate exprimendarum, et inserendarum defectus perpetuo supplemus.

15. Summus Pontifex Protector huius Congregationis.

Dictosque Camillum, et Socios, ac ipsam Congregationem, illiusque membra omnia nunc, et pro tempore in quibusvis locis consistentia, sub Nostra, et huius Sanctae Sedis Apostolicae, ac Beati Petri speciali, et immediata protectione suscipimus, et admittimus.

16. Quatuor vota sollemnia.

Ereectio Congregationis in Religionem (i. e. Ordinem).

Et nihilominus potiori pro cautela Camillo, et Sociis praefatis, ac eorum cuilibet, ut quandocumque eis visum fuerit, possint praedicta substantialia religiosae vitae, Paupertatis videlicet, Castitatis, et Obedientiae, et perennis Ministerii aegrotantium vota iuxta praefatae formulae tenorem emittere. Et Praefectus hac prima vice eligendus in manibus cuiuscumque Personae in dignitate, seu administratione Ecclesiastica constitutae saecularis, vel cuiusvis Ordinis Regularis solemniter profiteri et tam ipse, quam alii pro tempore existentes Praefecti, et Socii eiusdem Congregationis sub nomine, et nuncupatione Clericorum Regularium Ministrantium Infirmis in communi, et de communi viventes in locis sibi forsitan iam concessis, vel in futurum concedendis, sub dicta immediata, et speciali protectione in unum habitare, et ex eis inter se Superiorem, Praefectum nuncupandum, eligere, ut praefertur, iuxta eorum formulam huiusmodi.

17. Admissio adspirantium.

Et quoscumque alios saeculares Clericos quavis dignitate fungentes seu laicos, qui, Deo inspirante, ad huiusmodi propositum, et communem vivendi modum sese conferre, et conformare voluerint, recipere, et post approbationem iuxta praedictam eorum formulam ad huiusmodi votorum Professionem in manibus eorum Superioris seu Praefecti emittendam, et ad communem vivendi modum admittere.

18. Facultas Constitutiones condendi.

Nec non inter eos quascumque Constitutiones particulares, quas ad huiusmodi Congregationis, seu Religionis finem, et Omnipotentis Dei gloriam, proximique utilitatem conformes esse, et conducere iudicaverint, condere; et tam hactenus factas, quam in posterum faciendas Constitutiones ipsas iuxta temporum, et locorum, ac rerum qualitatem, et varietatem mutare, alterare,

seu in totum cassare, et alias de novo condere, facere, et edere possint, et valeant; quae postquam mutatae seu de novo conditae, editae, ac ab Urbis Vicario examinatae, et approbatae fuerint, eo ipso dicta Apostolica auctoritate confirmatae, et approbatae, ac etiam de novo concessae etiam sub quacumque data per Praefectum, seu alios Superiores dictae Congregationis eligenda sint, et esse censeantur, dummodo tamen sacris Canonibus, et Concilii Tridentini Decretis, ipsiusque Congregationis regularibus Institutis non contrariantur, quas, ut praefertur, sine nova approbatione Sedis Apostolicae vel primo conditas. vel mutatis servare in omnibus teneantur secundum Instituti rationem.

19. Communicatio privilegiorum.

Nec non etiam eidem Camillo, et Sociis, ac pro tempore existentibus Praefectis Generalibus, aliisque omnibus, et singulis personis dictae Congregationis, ut omnibus, et singulis quibuscumque etiam speciali nota dignis privilegiis, exemptionibus, immunitatibus, indulgentiis, facultatibus, libertatibus, auctoritatibus, indultis, favoribus, praerogativis. concessionibus, et gratiis quorumvis etiam Cisterciensium, Cluniacensium, ac Sancti Benedicti Monachis, Clericis Regularibus, et Praesbyteris collegialibus Societatis Iesu, et Canonicis Congregationis Lateranensis, ac quibuscumque aliis Clericis Regularibus, et aliorum tam Mendicantium, quam non Mendicantium Ordinum, et Congregationum Fratibus, et Personis tam in spiritualibus, quam in temporalibus in specie, vel in genere, etiam communicative per quoscumque Romanos Pontifices Praedecessores nostros, ac Sedem praefatam quomodolibet concessis, quae tamen sint in usu, nec sub ullis revocationibus comprehensa, neque Decretis dicti Concilii, nec ipsius Congregationis regularibus Institutis contraria, et quibus illi tam in vita, quam in mortis articulo etiam circa peccatorum remissiones, et iniunctarum poenitentiarum relaxationes, aut alias quomodolibet uti, potiri, frui, et gaudere possunt, aut poterunt, quomodolibet in futurum perpetuis futuris temporibus uti, potiri, frui, et gaudere, ac illorum omnium participes esse possint, et debeant pariformiter, et aequae principaliter absque ulla prorsus differentia perinde ac si Congregationi, Praefectis, Sociis, ac Personis, et eorum Domibus, et Ecclesiis, vel Oratoriis huiusmodi nominatim, et specialiter, ac generaliter concessa fuissent.

20. Facultas absolvendi.

Ac pro tempore existenti Praefecto Generali huiusmodi ut per se, vel alium, seu alios ad id per eum pro tempore deputatum, seu deputatos, omnes,

et singulos eiusdem Congregationis Socios, et personas sub eius obedientia, disciplina, et correctione pro tempore degentes ab omnibus, et singulis eorum peccatis ante, vel post ingressum in dictam Congregationem per eos commissis; nec non a quibusvis excommunicationis, suspensionis, et interdicti, aliisque Ecclesiasticis, et saecularibus sententiis, censuris et poenis a iure, vel ab homine, non tamen nominatim, quomodolibet latis, et promulgatis, et huiusmodi sententiis innodatos, aut in locis Ecclesiastico interdicto suppositis divina Officia celebrantes, et suscipientes, et censuris huiusmodi sic legatos, et propterea aut alias ex quocumque capite, vel causa, praeterquam homicidii voluntarii, bigamiae, ac membrorum mutilationum, irregularitatem incurrentes Apostolica auctoritate in foro conscientiae tantum absolvere, nec non cum eis, si opus fuerit, etiam cum rehabilitatione, et abstersione inhabilitatis, et infamiae maculae dispensare: ita tamen quod sic absoluti, et dispensati pro tempore, si ab huiusmodi Congregatione quandocumque egrediantur, eo ipso in pristinas sententias, et censuras, a quibus eos absolvi contigerit, relabantur, et reincidant.

21. Receptio ordinum sacrorum.

Ipsisque Sociis, et Fratribus expresse professis Congregationis huiusmodi, et eorum singulis ut a quibuscumque maluerint Catholicis Antistitibus gratiam, et communionem dictae Sedis habentibus, ad sacros etiam Praesbyteratus Ordines sub titulo paupertatis Congregationis huiusmodi promoveri, de licentia tamen Praefecti, seu alterius eorum Superioris secundum eorum Constitutiones; ipsique Antistites ordines ipsos huiusmodi Sociis absque obedientiae, et omni alia promissione, vel obligatione conferre.

22. Absolutio a defectu natalium.

Ac dicto Praefecto Generali pro tempore existenti, seu de illius licentia Praefectis inferioribus aliorum Locorum. seu Provincialibus dictae Congregationis pro tempore existentibus, et illorum Vicariis, et Locatenentibus ut cum eiusdem Congregationis personis defectum natalium etiam ex adulterio, sacrilegio, incestu, et quovis alio nefario, et illicito, ac prohibito, et damnato coitu proveniente patientibus postquam in dicta Congregatione vota emiserint ut defectu huiusmodi non obstante ad quoscumque sacros etiam Praesbyteratus Ordines promoveri, et in illis in Altaris ministerio ministrare; nec non ad quascumque administrationes, personatus, praeeminencias, et officia dictae Congregationis eligi, admitti, et assumi, illaque gerere, et exercere.

23. Erectio domorum.

Ac Praefecto, et Sociis Congregationis huiusmodi ut quaecumque Loca, et Domus ad inhabitandum eis donata, vel ab illis quomodolibet habita, in Domos, et Oratoria Ordinis, et Congregationis huiusmodi erigere, facere, seu erigi procurare absque nova dictae Sedis desuper obtinenda approbatione libere, et licite possint, et valeant; nec non si contingat Praefectum, et Socios ipsos aliquam Domum, Ecclesiam, Oratorium, seu quemvis alium locum dictae Congregationis aedificare, et construere, seu id per alicuius personae testamentum mandari, vel quovis modo offerri Domum, Ecclesias, seu Oratoria, vel loca huiusmodi cum omnibus ad id necessariis, et opportunis construi, et aedificari, ac locum pro huiusmodi constructione oblatum recipi posse, ipsasque Domos, Ecclesias, Oratoria, et cellas ubilibet per dictos Socios pro tempore constructa, vel eis donata, eo ipso quod aedificata, vel donata fuerint, Apostolica auctoritate erecta, approbata, et confirmata; ac bona quaecumque pro Domorum, vel Oratoriorum huiusmodi, vel personarum inibi commorantium sustentatione, et manutentione per quoscumque Christifideles pro tempore donata, relicta, et legata eo ipso praedicta Auctoritate perpetuo applicata, et appropriata esse, et censeri, Ecclesiasque, et Oratoria praefata cum Coemeteriis per quoscumque Episcopos benedici, seu consecrari, et quovis modo polluta reconciliari possint, et debeant, perpetuo concedimus, et indulgemus, statuimus, et ordinamus.

24. Apellatio a correctione Regulae.

Et volumus quod a correctione Regulae Congregationis huiusmodi secundum ordinationes facta, ut vigor disciplinae melius conservetur, appellari, aut talis appellatio per ullum Iudicem admitti, nec ab officiis absolutio, aut privatio peti nullatenus possit.

25. Praelaturae et aliae dignitates.

Nec Praefectus Generalis dictae Congregationis pro tempore existens aliquam dignitatem extra Religionem, seu Congregationem ipsam sine eiusdem seu illius Congregationis expressa licentia, nec aliquis ex Sociis huiusmodi absque consensu dicti Praefecti Generalis, et expressa licentia, quae dari non valeat, nisi ad id a Romano Pontifice per obedientiae praeceptum pro tempore fuerint coacti, Praelaturas, vel quamcumque aliam Dignitatem acceptare, vel ad illam assumi queat.

26. Confessarii Religiosorum.

Nec non quod quilibet ex Sociis Congregationis huiusmodi peccata sua proprio Praefecto, vel ab eo deputato, seu deputatis, et alias secundum ordinationes Congregationis praefatae designatis, seu designandis confiteri debeat, nisi super hoc a dicto proprio Praefecto alium Confessorem eligendi facultatem habuerit.

27. Transitus in alium Ordinem.

Ac inhibemus ne quis post emissa Vota secundum Constitutiones, seu ordinationes eiusdem Congregationis ad quemvis alium Ordinem, etiam per Sedem praefatam approbatum (Carthusiensium Ordine dumtaxat excepto) transferri; egressi vero alias quam, ut praefertur, de Ordine, seu consortio huiusmodi in nullo alio praeterquam Cartusiensium Ordine praedicto admitti, recipi, vel retineri possint.

28. Apostatae.

Ipsae Praefectus Generalis, et alii inferiores Praefecti eiusdem Congregationis per se, vel alios illos sic egressos, et alios quoscumque dictae Congregationis Apostatas, et etiam alios quosvis insolentes, et qui id mereri videbuntur, in quocumque habitu Apostatas praefatos contigerit reperiri, excommunicare, capere, incarcerare, coercere, et alias suae disciplinae submittere; nec non ad id, si opus fuerit, auxilium brachii saecularis invocare.

29. Aggregatio.

Insuper Praefecto Generali, vel de eius licentia aliis Locorum Praefectis, seu Superioribus dictae Congregationis etiam pro tempore existentibus, ut in sua Congregatione quoscumque alios saeculares, Laicos, Clericos, seu in Praesbyteratus Ordine constitutos aggregare, et adiicere pro piis misericordiae, et caritatis operibus huiusmodi exercendis: qui sic aggregati omnibus, et singulis indulgentiis, et gratiis eiusdem Congregationis gaudeant, et potiantur, et gaudere, ac potiri debeant, et illas consequantur dummodo ea opera faciant, et exercent, quae pro eisdem indulgentiis, et gratiis consequendis fuerint praescripta.

30. Oratoria.

Nec non Praefecto Generali, et aliis Superioribus, nec non de eorum etiam facultate universis Fratribus, et Sociis Congregationis Ministrantium Infirmis huiusmodi in Praesbyteratus Ordine constitutis ut in locis, ubi degunt, et eos pro tempore morari contigerit, habere Oratoria, et in eis Missas, et alia Divina Officia celebrare, ac Ecclesiastica Sacramenta recipere, libere, et licite possint, et valeant, respective etiam concedimus, et indulgemus.

31. Privilegium exemptionis.

Ipsamque Congregationem Ministrantium Infirmis et universos illius Socios, et Personas singulas, ac eorum bona, et res quascumque ab omni Superioritate, Iurisdictione, Correctione, et Visitatione quorumcumque locorum Ordinariorum, et Episcoporum, salva tamen decretorum dicti Concilii dispositione, eximimus, et penitus liberamus.

32. Gratiae aliis concessae ad Nostros extenduntur.

Nec non privilegia, indulgentias, praerogativas, exemptiones, immunitates, gratias et indulta Monachis, et Fratribus, ac Societati Iesu, et Canonicis, aliisque Personis supradictis tam in spiritualibus quam in temporalibus tam in specie, quam in genere, etiam communicative concessa, ut praefertur, ad Praefectum Generalem etiam pro tempore existentem, aliosque Socios, et etiam Particulares Congregationis huiusmodi Ministrantium Infirmis perpetuo extendimus, et ampliamus, ac in eis locum habere, et suum plenarium effectum sortiri debere decernimus, et declaramus.

33. Indulgentiae.

Et insuper Animarum profectui providere volentes de Omnipotentis Dei misericordia, ac Beatorum Petri et Pauli Apostolorum eius auctoritate confisi, omnibus et singulis Christifidelibus vere poenitentibus, et confessis, ac sacra Communione refectis, qui dictam Congregationem pro tempore ingredientur, die primi illorum ingressus, et receptionis, ac emissionis professionis; nec non qui similiter poenitentes, et confessi, si id commode fieri poterit, ac dicta Communione refecti in dicta Congregatione pro tempore decesserint, in eorum mortis articulo praesertim in Proximi subventionem ratione pestis seu cuiuscumque alterius morbi contagiosi, in forma Iubilaei Anni Sancti Romae concedi soliti, nec non etiam vere poenitentibus, et confessis, ac Sanctissimo

Eucharistiae Sacramento refectis in piorum operum misericordiae, et caritatis exercitio perseverantibus, singulis primis diebus Dominicis cuiuslibet mensis plenariam omnium peccatorum suorum indulgentiam, et remissionem misericorditer in Domino concedimus, et elargimur. Ac eisdem Sociis, et Religiosis dictae Congregationis, et in ea aggregatis ut etiam omnibus, ut praefertur, et singulis indulgentiis, quibus ipsimet Religiosi gaudent, et eos gaudere, ac potiri volumus quotiescumque infirmis praesto fuerint, ac illos noctu visitaverint, et curaverint, eorumque lectos faciendo, ac illis ad manducandum porrigendo, et auxiliando, ac disponendo ad bene moriendum, et viam salutis, ac doctrinam Christianam illos docendo, ac denique omnia officia caritatis vel spiritualia, vel corporalia, quae ad Animarum aedificationem pertinent, exercendo, et Sacramenta Ecclesiastica administrando, caeteraque similia praestiterint, pro quolibet praemissorum piorum operum, nec non omnibus, et singulis Officialibus, et Ministris, ac aliis personis dictae Congregationis ob infirmitatem, vel propter obedientiam, seu alia de causa Domini remanentibus, si quinque Orationem Dominicam, et toties salutationem Angelicam devote recitaverint, etiam viginti annos, et totidem quadragenas de eis iniunctis, et aliis quomodolibet debitis poenitentiis misericorditer in Domino relaxamus.

34. Benefactores.

Ac quod omnes, et singuli utriusque sexus Benefactores huius Congregationis possint esse participes omnium operum meritoriorum, quae in Congregatione huiusmodi pro tempore fient, etiam concedimus, et indulgemus.

35. Clausula praeservativa.

Decernentes easdem praesentes Litteras sub quibuscumque similium, vel dissimilium indulgentiarum, vel aliarum gratiarum revocationibus, suspensionibus, limitationibus, derogationibus, et aliis contrariis dispositionibus, etiam in favorem Basilicae Principis Apostolorum de dicta Urbe, seu Cruciatuae sanctae, aut etiam per Nos, seu per alios Romanos Pontifices Praedecessores nostros, ac dictam Sedem etiam Motu, et potestatis plenitudine similibus, seu ad quorumvis Imperatorum, et Regum instantiam pro tempore quomodolibet factis minime comprehendi, seu semper ab illis exceptas, et quoties illae emanabunt, toties in pristinum statum restitutas, repositas, et plenarie reintegratas, ac de novo concessas esse, et censeri debere.

36. Clausula sublata etc.

Sicque per quoscumque Iudices, et Commissarios, quavis auctoritate fungentes, etiam Sanctae Romanae Ecclesiae Cardinales, et causarum Palatii Apostolici Auditores, sublata eis, et eorum cuilibet quavis aliter iudicandi, et interpretandi facultate, et auctoritate, ubique iudicari et definiri debere, irritum quoque et inane, si secus super his, a quoquam, quavis auctoritate, scienter vel ignoranter contigerit attentari.

37. Executores et defensores.

Quocirca, Venerabilibus Fratribus nostris Ostien. et Tusculan. Episcopis, ac dilecto filio causarum Curiae Camerae Apostolicae Generali Auditori, per Apostolica scripta, Motu pari mandamus, quatenus ipsi, vel duo, aut unus eorum, per se, vel alium, seu alios, praesentes litteras, ac omnia, et singula in eis contenta, ubi, et quando expedierit, ac quoties pro parte Praefecti et Sociorum praedictorum fuerint requisiti, solemniter publicantes, eisque in praeinsertis, efficacis defensionis praesidio, assistentes, faciant Auctoritate Nostra, praemissa omnia observari. Non permittentes, Praefectum ac Socios praefatos, desuper a quoquam, quomodolibet molestari seu inquietari, contradictores, dicta auctoritate Nostra, appellatione postposita, compescendo.

38. Derogatio contrariorum.

Non obstantibus piae mem. Bonifacii Papae VIII etiam Praedecessoris nostri, qua cavetur, ne Mendicantes, Loca ad inhabitandum, recipere, seu recepta mutare praesumant, absque dictae Sedis licentia speciali, de prohibitione huiusmodi, expressam mentionem faciente; nec non dicta Sixti Praedecessoris, ac Pictavien. Concilii contra illegitimos, et quorumcumque aliorum Romanorum Pontificum, Praedecessorum nostrorum, ac Nostra, de non concedendis indulgentiis ad instar, Constitutionibus, et Ordinationibus Apostolicis, ac Cisterciens., Cluniacens. Sancti Benedicti, Mendicantium, et Societatis Iesu, et Canonice Lateranen. Ordinum huiusmodi, iuramento, confirmatione Apostolica, vel quavis firmitate alia roboratis, statutis, et consuetudinibus, privilegiis quoque, indultis et litteris Apostolicis, quibusvis personis, per quoscumque Romanos Pontifices Praedecessores nostros praefatos, ac Nos, et dictam Sedem, etiam Motu, scientia, et potestatis plenitudine, similibus, ac quibusvis etiam derogatoriis derogatoriis, aliisque efficacioribus, et insolitis clausulis, irritantibusque, et aliis decretis, in genere, vel in specie, ac alias quomodolibet, etiam pluries concessis, approbatis et innovatis. Quibus

omnibus et singulis, etiamsi de illis, eorumque totis tenoribus, specialis, specifica, expressa, et individua, non autem, per clausulas generales idem importantes, mentio, seu quaevis alia expressio habenda foret, illorum tenores praesentibus pro expressis habentes, illis alias in suo robore permansuris, hac vice dumtaxat, specialiter, et expresse, Motu pari, derogamus contrariis quibuscumque. Aut, si aliquibus communiter, vel divisim, ab eadem sit Sede indultum, quod interdici, suspendi, vel excommunicari non possint, per litteras Apostolicas, non facientes plenam, et expressam, ac de verbo ad verbum, de indulto huiusmodi, mentionem.

39. Fides transumptorum.

Volumus autem, quod earundem praesentium transumptis, etiam impressis, manu alicuius Notarii publici subscriptis, et sigillo alicuius Canonici Metropolitanae, vel alterius Cathedralis Ecclesiae, seu personae in dignitate ecclesiastica constitutae, munitis, eadem prorsus fides in iudicio, et extra, adhibeatur, quae praesentibus eisdem adhiberetur, si forent exhibitae, vel ostensae.

40. Sanctio poenalis. Datum.

Nulli ergo omnino hominum liceat hanc paginam nostrae absolutionis, approbationis, confirmationis, adiectionis, appositionis, suppletionis, susceptionis, admissionis, concessionis, indulti, statuti, ordinationis, exemptionis, liberationis, extensionis, ampliacionis, decreti, declarationis, relaxationis, mandati, derogationis, et voluntatis, infringere, vel ei, ausu temerario, contraire. Si quis autem, hoc attentari praesumpserit, indignationem Omnipotentis Dei, ac Beatorum Petri et Pauli Apostolorum eius, se noverit incursum.

Datum Romae, apud Sanctum Marcum, anno Incarnationis Dominicae, millesimo quingentesimo nonagesimo primo, undecimo Kal. Octobris, Pontificatus Nostri Anno primo.

S. DE URSINIS

Pro Reverendiss. D. Summatore F. Hierosol.

M. VESTRIUS BARBIANUS.

J. N. V. Loco † Bullae plumbeae.